

IDARA ANDITIENE-CHRIST

Ñwed Mbon Philippi 3:1-3, 7-16, 20, 21; 4:1-13.

ỌYỌHỌ UKPEP-ÑKPO 406

Eke Ikpọ Owo

IKỌ IBUOT: “Edat esit ke Ọbọñ kpukpru ini; nyetọñ ntak ndọhọ, Edat esit” (Ñwed Mbon Philippi 4:4).

I Mme Ntọt

Enọ nditọ ete item ete ekpeme idem ye mme anam-idiọk utom ye mme Jew nde, Ñwed Mbon Philippi 3:1, 2; 2 Peter 2:1.

Mme ana mbobi ke Spirit edara ke Christ Jesus, Ñwed Mbon Philippi 3:3.

II Ndiyom Mbiet Christ

Uduak Paul ekedi ndikpọñ kpukpru ñkpọ ke edem man anam ñkpọ ọnọ Ọbọñ Jesus Christ, Ñwed Mbon Philippi 3:7-9.

Paul ama ebieren nditiene Ọbọñ ke ukut nsim eriset ke mkpa, Ñwed Mbon Philippi 3:10, 11; 2 Ñwed Timothy 2:12.

Enye akañwana ndidọdọk ñka iso ke mfọn Abasi, Ñwed Mbon Philippi 3:12-14.

Enye ọnọ nnyin item ete isaña nte odotde ye ikot nnyin, Ñwed Mbon Philippi 3:15, 16; Ñwed Mbon Ephesus 5:2.

Idorenyin nnyin odu ke eridi Ọbọñ, Ñwed Mbon Philippi 3:20, 21.

III Edat Esit Ke Ọbọñ

Enye eteme nditọ-ete ete ediana kiet enyuñ eñwam kiet eken, Ñwed Mbon Philippi 4:1-3; 1 Ñwed Corinth 1:10.

Eti idaha mmọ enyene ndiwọrọ ñwut idem ke akam ekọm mmọ ye idaresit, Ñwed Mbon Philippi 4:4-6.

Abasi eyemum mmọ emi ekopde mme item emi akama, Ñwed Mbon Philippi 4:7; Isaiah 26:3.

IV Mme Ekikere Emi Inyenede Ndikpeme

Anditiene-Christ enyene ndikere mbaña mme ñkpọ eke enende, Ñwed Mbon Philippi 4:8, 9; 2 Ñwed Corinth 10:4, 5.

Paul adat esit koro enye ama ekpẹp ndibuọt idem ye Ọbọñ ke kpukpru idaha, Ñwed Mbon Philippi 4:10-12.

Erikan ye odudu esie oto Christ, Ñwed Mbon Philippi 4:13; Habakuk 3:19.

SE EKPEPDE EBAÑA

Edisana Udọñ Paul

Ata akpan udọñ Paul ke uwem ekedi ndisim akpa eriset. Enye ama ọfiọk ete ke ndisim oro edidi uyọhọ akwa udori esie ke kpukpru utom ye idomo emi ekokotde enye ete edisaña ebe. Enye ama enyene ñkukut emi akanamde enye ọduọñ kpukpru udọñ ke abaña ñkpọ isọñ emi. Mme udori ye nti idaha emi enye ekenyenede mbemiso enye akabare esit, enye akabat ke ikpikpu ñkpọ. Enye akabat mmọ ke ata ñkpri ñkpọ tutu mmọ ekabare edi mme ñkpọ eke esinde minyuñ idotke nte etide ebaña. Emi edi akpanikọ ke uwem kpukpru mme anditiene-Christ mme mme ñkpọ emi ediwak owo enyamde ukpọñ mmọ enọ idighe se idotde okposuk edi ekepede ekọm-urua eke okponde ndinyene mmọ. Asaña-utom Abasi ndifre mbaña edifehe mbine ñkpọ isọñ emi etie nte ndisime ke enyin owo emi minyeneke erinyaña. Edi idara ye edidiọñ emi anditiene-Christ enyenede idighe se edade edomo ye ikpikpu ñkpọ ererimbot emi. Idara esie edi utọ oro okuk mikemeke ndidep. Itooro owo ye

idaha ke ererimbot idighe udōn esie, edi uduak esie edi ndinem Enye emi okokotde enye esin ke ikot Heaven esit.

Idara emi okponde akan emi owo akanam enyenede edi idara erifen nnọ ke mme idiok-ńkpọ. Ofuri uduot owo ke ererimbot enyene ifiok ńkpọ kiet emi, oro edi ubiom-ikpe idiok-ńkpọ kpukpru owo emi edude ke idak idiok-ńkpọ efiok ubiom-ikpe idiok-ńkpọ odobide akpan-akpan ke ini Abasi ọdōnde Edisana Spirit ete ediwut nnyin ndudue nnyin. Ntem ke mbiomo idiok-ńkpọ ekpere ndidobi ńkan nte eyode; ndien edinọ erifen nnyuń mbiomore mbiomo ada idara emi owo mikemeke nditiń edi, idara erinyańa ukpọń.

Ndiyom Mbiet Christ

Paul ikabatke idem esie nte imọ imosim utit ke mbuba esie ndika Heaven edi enye asak iso nte itiat osuk ese Zion. Enye ekfefre abańa mme ńkpọ oro edude ke edem onyuń esin ifik oyom mme ńkpọ Abasi. Enye ama ọfiok ete ke mbuba imọ ọyọhọ ye ata ubọń onyuń ọfiok ńko ete ke idaresit imọ eyeyọhọ ke ini imọ idisobode ye Jesus iso ye iso. Ke mme akpatre usen uwem Paul, enye ama ekeme ndiwọńre enyin nse edem onyuń ọdọhọ ete: “Mma ńńwana eti eńwan, mma mfehe mbuba mi mma, mma ńsọńo mmum mbuotidem ńkama. Ema enim anyanya eti ido ebeńe mi, emi Ọbọń, kpa Edinen Ebierikpe, edinode mi ke usen oro; idinyuń inọhọ mi ikpọń, edi eyenyuń ọnọ kpukpru mmọ emi emade ediyarare Esie” (2 ńwed Timothy 4:7, 8). Ke utit ikọ-ntiense esie emi enye eketińde ọnọ Timothy, eketie nte enye ọmọń osim utit mbuba. Mme utom esie ekedu enye ke edem, ikpa, ufok- mkpọkọbi, edisip ubom, ńkpọ-ndik ke mmọń, mbon inọ, ukọbọ mme okpono ndem, ńkpọ-ndik ke obio ye ke nsat-isoń. Biọń ye nsat itọń, tuel ye iferi kpukpru ekedu enye ke edem. Ke idem ini emi mme ńkpọ emi ekedide, enye akabat mmọ kpukpru ke idaresit enye ndibiom ukut ke ntak Jesus; edi ke emi uwem esie ekperede ndibe mfep, enye ọmọń ọsọp ọfiok se ọwọrde owo ndidemere ke mbiet Christ. Utọ ini oro ikpọń ke idara ye idaha erinyańa esie editim ọyọhọ. Idara emi ekedi utibe, ebuana kiet ye eken ama onyuń enem; nsinsi idara ke osuk ebet enye, onyuń ebet kpukpru mmọ emi edibuanade ke Akpa Eriset. Ikpakpaha owo idem ndien ndikop nte Paul, sia ọfiokde emi, ke ini odude ke ufok- ńkpọkọbi ke Rome etińde ete, “mmesin ifik ńka iso mbine utit mbuba, man ńkpọbọ utip akwa ikot eke Abasi okokotde mi ke Christ Jesus” (ńwed Mbon Philippi 3:14).

Edat Esit Ke Ọbọń

Enọ nnyin item ete idat esit ke Ọbọń. Ndusuk owo ekere ete ke emi etie nte ńkpọ mfọn, idighe utom eke anade nte enam. Mbuotidem ke Abasi ananam nnyin idat esit. Christ ke ntak idaresit emi akanade Enye ke iso onyime ndibiom krọs. Enem nnyin esit eti-eti ke ikutde ite Enye ama obiom mme idiok-ńkpọ nnyin ke Calvary. Idara emi akanade Enye ke iso ekedi man Enye ekpedi Andinyańa nnyin. Idara nnyin ana nte edi ke Ọbọń. Uwem anditiene-Christ edi enye emi ọyọhọde ye erikan ye emem. Anditiene-Christ odori mme idiok-ńkpọ esie ke Jesus; enye otop kpukpru mfina esit odori ke Abasi; emen ndik esie odori ke mme eńwọńọ Abasi; ke utọ itie eke ọfonde ntem enye inyeneke ufań ke esit esie inọ ńkpọ efen ikan idara. Ke ini enye ekerede abańa mmọ emi minyeneke erinyańa, enye onim ke akpanikọ ete ke Abasi emi akanyańade imọ eyenam kpasuk ntre ọnọ mmọ emi enye amade. Enye ikemeke ndibiom mme idiok-ńkpọ mmọ; inyuń ikemeke ndikabare esit nnọ mmọ; edi nte enye ọbọńde akam ke mbuotidem, adat esit sia enye ekemedede ndidori enyin ke Abasi ye ke Ikọ Esie.

Eti Idaha Ye Mbuotidem

Abasi oyom ikọt Esie ewut eti idaha mmọ. Inaha nte inyime inọ se midotke, me ndinam baba ńkpọ kiet emi ńwed Abasi asuade; ana iti ńko ite ke Abasi idighe Abasi ndutime me eke isio-isio edinam. Ndusuk itie ukpono Abasi esio ńkpọ kiet ke Ikọ Abasi enyuń ekabare enye ke ata isio usuń emi anamde ukpep-ńkpọ mmọ mikemke ye Ikọ Abasi onyuń etie ndisime-ndisime. Nnyin inyene ndida Ikọ Abasi ńkabare Ikọ Abasi, idighe ndisio ufań ikọ Abasi nnyuń mmen ofuri se inimde ke akpanikọ ikọkọń ke se ufań ikọ kiet ikpọń odomode ndikpep. ńwed Abasi ifańake se enye ekpepde. Nnyin inyene ndikpep ofuri ńwed Abasi inyuń inim ke akpanikọ man itim ikeme ndikpep ikọ akpanikọ emi. Nnyin ikot ke ńwed John 7:17; “Edieke owo onyimedede ndinam se enye amade, owo oro eyefiok abańa se ńkpepde, mme oto Abasi, mme Ami ntiń ikọ Idem Mi”. Mme owo emi esinde ndinam uduak Abasi esitọńọ ediwak nsu-nsu ukpep-ńkpọ. Mmọ esiak ukpep-ńkpọ mmọ

enyuñ ekabare Ikọ Abasi ke usuñ idem mmọ man efuk mme idiok-ñkpọ mmọ. Abasi eketiñ abañā mfiak-edem nditọ Israel ete: “Koro ikọt Mi emenam idiok-ñkpọ iba; emekpọñ Mi idim mmọñ uwem, enyuñ etibe obube enọ idem mmọ, kpa ndisiaha obube eke mikamake mmọñ” (Jeremiah 2:13).

Abasi oyom ikọt Esie ebuọt idem ye Enye. Ke mmọ enamde oro. udọñ-esit idifinake mmọ ikaha. Emi ñko ọwọrọ ete mmọ idiyakke mme udọñ esit mmọ akara mmọ. Edieke nnyin imende kpukpru mme udọñ nnyin isok Abasi ke akam ye ekọm, Enye eyemen kpukpru oyomo-nsia nnyin efep. Ke ini nnyin ibọñde akam inọ Abasi ke mbuotidem, nnyin inim ke akpanikọ ite ke enye eyeborọ akam nnyin onyuñ anam mme ebeñe nnyin nte ekemde ye uduak Esie. Kpukpru akam ye udọñ nnyin esine ke idak uduak Abasi koro baba eyen Abasi kiet iyomke ndinam uduak esie okpon akan eke Abasi. Jesus ama onim uwut-ñkpọ ọnọ nnyin ke ini enye ọkọbọñde akam ke Iñwañ Gethsemane ọkọdọhọ ete: “O Ete Mi, edieke usuñ odude, yak emi ebe ọkpọñ Mi; edi yak okudi nte Ami nnyimede; edi yak edi nte Afo onyimede (Matthew 26:39).

Mme Ekikere Nnyin

Abasi ekpep nnyin ke ukpep-ñkpọ emi ete ke ana nte nnyin ikara mme ekikere nnyin. Ñkukure idorenyin erinyaña oto ke ntak enyene-utip iyip emi Jesus ọkọduokde. Ke ntre inyañake nnyin ito ke ekikere nnyin, edi eteme nnyin ete ikere ibaña mme ñkpọ eke enende. Ana nte owo ekere abañā se inende man ekeme ndibọñ akam nte enende. Nnyin ikemeke ndinam idem nnyin edinen ke ekikere nnyin, edi sia ema enam nnyin inen oto ke edinen-ido Christ, nnyin imekeme ndinim mbet Abasi inyuñ ikere mme ñkpọ emi edide akpanikọ, enende, asanade, eyede, enyenede eti etop, enyuñ edotde itoro.

Nnyin kpukpru imọfiok mme owo emi ekutde ndudue enọ kpukpru owo. Nnyin ikemeke ndikere ite ubiere-ikpe esie oto Abasi. Enọ nnyin item ete ibọñ akam ibaña mme anam-idiok inyuñ iñwam mmọ emi eduode. Nnyin imọfiok ite ke ido editiñ ikọ eke akpabiatde-biat itoho ke esit emi esemede ke akam ọnọ Abasi man atua mme anam-idiok mbọm. Nnyin ikpawakke ndinyan ubok ñwut mme ikpọ idiok-ñkpọ emi andidiok anamde. Ke kpukpru idaha ke uwem, ifet odu ndiwut nte ke kpukpru ñkpọ esaña ọtọ kiet enam ufọn enọ mmọ eke emade Abasi (Ñwed Mbon Rome 8:28). Inaha nte nnyin ifuk idiok-ñkpọ ke edifiñ ibuoit ñkot idiok eti, koro ekpededi, ke ndisua nnọ idiok-ñkpọ ke uwem owo efen, idorenyin ubọhọ osuk ododu; Abasi ke amama enye, eyenyuñ efen ọnọ enye edieke enye akabarede esit. Ọfọfọn ọnọ owo eke onimde esit ke Ọbọñ onyuñ adarade ke mme mbọm Esie. “Ama edi esit eke eberede (Fi), afo eyekpeme enye ke emem emem: koro enye ọbuotde idem esie ye afo” (Isaiah 26:3).

Erikan Ke Kpukpru Idaha

Inemesit Paul ke Eti mbuk ikedighe koro ñkpọ ọkọfọnde ye enye akaha. Enye ama okop biọñ, ama onyuñ ọyuhọ. Enye ama okop tuep ama onyuñ okop ufiop. Enye ama adara ke uñwam emi mme anditiene Christ ke Philippi ekenode enye ke ntak utip emi mmọ edibode ke usiene enọ mmọ (Ñwed Mbon Philippi 4:17). Edieke ekpedide ke ñkpọ uwem emi ikpọñ ke mme anditiene Christ edori enyin ndibọ edidiọñ Abasi, ediwak ikpenyeneke idorenyin. Ediwak mmọ emi ebunede ekan ke ererimbot esinyene ata utibe erikan ke Spirit mmọ. Ediwak emi ekedide mme enyene ñkpọ ererimbot emi ini kiet ko, edikut idem mmọ ke ata itie unana, edi emi ikanamke mbuotidem ke Abasi ọbọhọ mmọ. Ke ediwak idaha, emi esidemere udọñ mmọ ke Spirit onyuñ anam edediọñ enyene esit ekọm ke abañā idorenyin nte ke ọfọn ye ukpọñ mmimọ.

Paul ama ọfiok ete ke odudu imọ odu ke Christ. Enye ikokopke ndik ke abañā se inade inọ enye ndibiom ke ini oro me ke ini iso, koro enye ama enyene eñwọñọ emi ọdọhọde ete nte usen owo edide kpa ntre ke odudu esie edi. Owo ama ọdọhọ ete ke imọ imenyene “odu-uwem mfọn” onyuñ otim ọfiok ete ke ini eke anade nte ikpa ekemde ke Abasi eyenọ imọ ọyọhọ mfọn eke ididade ikpa.

MME MBUME

- 1 Mme anie ke ekot mme ana-mbobi eke Spirit?
- 2 Nso ke Paul akabat ke ntak-urua ke ntak Eti Mbuk?
- 3 Nso utọ akpan idaha ke Paul okoyom ke esit esie?
- 4 Nte Paul amabat idem esie ete imosim utit? Nso ke enye akanam abañā emi?
- 5 Nso ekpedi añwa-añwa idiñọ ndiwut ete Ọbọñ odu owo ke esit?
- 6 Mmọ ekenyene ndikere mbañā nso?
- 7 Nso ke mmọ ekenyene ndinam ke abañā mfina esit mmọ?
- 8 Nso akana nte edi edu uwem mmọ ke abañā mme ido ye edinam emi mikemke ye ikọ Abasi?
- 9 Nso ke Paul ekepep ndinam ke mme nsio-nsio idaha?
- 10 Paul ọkọdọhọ ete ke odudu imọ oto ke mmọñ?